

## Communicaziun a las medias

December 2022

### Ditgas da las Alps

**La Blüemlisalp, Guglielm Tell, la Punt dal Diavel – il territori alpin svizzer posseda in grond stgazi da ditgas. Intginas da quellas vegnan ussa raquintadas en il Museum naziunal svizzer a Turitg.**

Nua che poppas da lain daventan vivas, pastgiras fritgaivlas sa transfurman en deserts crappus u ina dunna cumpara sco animal, là è il mund da las ditgas. Cuntrari a las paraulas vegnan quests raquints resentids sco «vairs», perquai che las ditgas èn adina colliadas cun lieus reals. Las ditgas istoricas paran particularmain «vairas»: persunas da l'istorgia che han existì per propi u supponidamain cumparan en lieus reals. In dals pli enconuschents exempels è la ditga da Tell che sajetta il mail giu dal chau da ses figl. L'istorgia che deriva oriundamain dal mund da ditgas nordic è vegnida adattada perfetgamain a las circumstanzas da la Svizra Centrala ed è sa sviluppada cun il temp ad in mitus da liberaziun impurtant. Guglielm Tell era in erox engraziaivel: el era adattà per rebellar cunter ils regents, per mussar la necessitad da l'atgna independenza u per rinforzar il curaschi da far resistenza. Pli tard è Tell vegnì stilisà a l'erox naziunal e ses balester è daventà il sigil da qualitad da products federals.

L'emprim che ha scrit l'istorgia da Guglielm Tell è stà Hans Schriber. Il scrivant da la Sursilvania ha eternisà l'erox legendar il 1470 en l'uschenumnà «Cudesch alv da Sarnen». In'otra ditga enconuschenta è vegnida nudada var 250 onns pli tard. Il medi e perscrutader da la natira Johann Jakob Scheuchzer ha publitgà il 1707 la ditga da la Blüemlisalp. In signun vanitus e sfarlattus viva en abundanza sin sia alp fritgaivla, entant ch'ils umans en la val endiran fom. Ma el na parta betg sia bainstanza e fa schizunt beffas da la populaziun desperada da la val. Sco chasti sa transfurma l'alp prosperaivla en in desert da crappa e glatsch. La ditga è da chattar en differentas variaziuns en l'entir territori alpin ed aveva gia per Scheuchzer ina funcziun educativa.

Independentamain da la vardaivladad fascineschan las ditgas ils umans fin oz. E cura che las sumbrivas vegnan pli lungas e sa transfurman andetgamain en il diavel u cura ch'il dutg alpin rampluna e fracassa sco in dragun che sa precipitescha a val, pon ins s'imaginar fitg bain pertge ch'ils umans avevan tema pli baud.

#### **Per ulteriuras dumondas As stat a disposiziun:**

Alexander Rechsteiner | communicaziun | Museum naziunal svizzer.

t. +41 44 218 65 64 | e-mail: [medien@nationalmuseum.ch](mailto:medien@nationalmuseum.ch)